



**Viðtakandi:** Leikskóla- og daggæsluráð

**Sendandi:** Steinn Jóhannsson, sviðsstjóri skóla- og frístundasviðs

Reykjavík, 3. september 2026

SFS26090023

## MINNISBLAÐ

### ***Eftirlit með daggæslu barna í heimahúsum á árinu 2025***

Með vísan til c. liðar 2. gr. viðauka 2.5, við samþykkt um stjórn Reykjavíkurborgar, um embættisafgreiðslur sviðsstjóra skóla- og frístundasviðs, fer skóla- og frístundasvið með lögbundið eftirlit með starfsemi dagforeldra til samræmis við reglugerð um daggæslu barna í heimahúsum nr. 907/2005.

Eftirlit með daggæslu í heimahúsum er þríþætt: Skil dagforeldra á yfirliti yfir skráð börn í gæslu, óboðaðar eftirlitsheimsóknir og könnun á viðhorfi foreldra til daggæslu. Skrifstofa skóla- og frístundasviðs hefur kannað viðhorf foreldra til daggæslu annað hvert ár og var könnun lögð fyrir foreldra í maí 2026.

Samkvæmt 34. gr. reglugerðar nr. 907/2005 getur félagsmálanefnd ráðið sérstakan umsjónaraðila sem hefur með höndum ráðgjöf og umsjón með daggæslu barna í heimahúsum. Umsjónaraðilar fara í heimsóknir til dagforeldra til að veita ráðgjöf og stuðning, halda fræðslufundi og fundi með dagforeldrum og foreldrum barna ef þörf krefur. Þetta verkefni er í höndum Suðurmíðstöðvar og eru þar starfandi tveir daggæsluráðgjafar sem sinna bæði ráðgjöf og eftirliti með öllum starfandi dagforeldrum í Reykjavík. Þar sem annar daggæsluráðgjafinn fer í ráðgjöf fer hinn ráðgjafinn í eftirlit, er það gert til að tryggja að sami aðili veiti ekki ráðgjöf hjá sama dagforeldri og hann sinnir eftirliti hjá.

Í janúar 2025 voru 73 dagforeldrar með starfsleyfi til daggæslu á 51 starfsstöð. Í janúar 2026 voru 69 dagforeldrar með starfsleyfi til daggæslu barna starfandi á 47 starfsstöðum. Þar af voru 18 starfsstöðvar starfræktar þar sem tvö dagforeldri starfa saman og tvær starfsstöðvar þar sem þrír dagforeldrar starfa saman með alls 10 börn. 3 dagforeldrar voru skráðir í leyfi frá störfum vegna veikinda/fæðingarorlofs og þrjár starfsstöðvar voru með skráð afleysingardagforeldri á sinni starfsstöð.

Áætlaður fjöldi starfandi dagforeldra fyrir haustið 2026 er 68 á 50 starfsstöðvum í Reykjavík

#### **I. Þjónustusamningar við dagforeldra**

Í mars 2026 höfðu 58 af 69 starfandi dagforeldrum í Reykjavík skrifað undir þjónustusamning dagforeldra frá því hann var samþykktur á 253 fundi skóla- og frístundaráðs 22. maí 2023 og á fundi Borgarráðs 13. júní 2023. Tíu af þeim 58 dagforeldrum sem skrifað hafa undir þjónustusamninginn eru dagforeldrar sem tekið hafa til starfa frá samþykkt borgarráðs og fá því greiddan stofnstyrk.



## II. Skil dagforeldra á yfirliti yfir skráð börn í gæslu

Skv. 35. gr. reglugerðar nr. 907/2005 skulu dagforeldrar skila yfirliti yfir skráð börn í gæslu, staðfest af eftirlitsaðila og foreldri barns.

Dagforeldrar senda daggæsluráðgjöfum afrit af dvalarsamningi barns sem skráð er í daggæslu þeirra og mánaðarlega senda dagforeldrar yfirlit yfir börn sem skráð eru í vistun hjá þeim í mánuðinum á eftir. Daggæsluráðgjafar bera innsend yfirlit saman við innsenda dvalarsamninga dagforeldra til staðfestingar á vistun og senda upplýsingarnar til fjármálaþjónustu skóla- og frístundasviðs sem sér um að greiða niðurgreiðslur vegna barna með lögheimili í Reykjavík til dagforeldra. Fjármálaþjónusta skóla- og frístundasviðs greiðir einnig niðurgreiðslur til dagforeldra í öðrum sveitarfélögum vegna barna í daggæslu þeirra með lögheimili í Reykjavík.

## III. Óboðaðar eftirlitsheimsóknir

Skv. 35. gr. reglugerðar nr. 907/2005 skal farið í þrjár óboðaðar eftirlitsheimsóknir á ári.

Í árslok 2025 var búið að fara í allar óboðaðar eftirlitsheimsóknir skv. 35. gr. reglugerðar nr. 907/2005 til allra starfandi dagforeldra í Reykjavík. Komi nýtt dagforeldri til starfa þegar líða tekur á árið, er farið í óboðað eftirlit á starfstöðina samkvæmt áætlun fyrir óboðaðar eftirlitsheimsóknir sem eftir eru það árið. Eftirlitsaðili getur þurft að fara oftari en þrisvar í óboðað eftirlit á starfsstöð daggæslu ef fylgja þarf eftir athugasemdum/ábendingum, hvort sem úr óboðuðu eftirliti eða vegna ábendinga til skóla- og frístundasviðs, einnig ef enginn var við í daggæslunni þegar komið var í óboðað eftirlit.

Á árinu 2020 færðust óboðaðar eftirlitsheimsóknir frá skrifstofu skóla- og frístundasviðs til skóla- og frístundadeildarinnar í Breiðholti.

Ef gerðar eru athugasemdir í eftirlitsheimsóknum sem þarf að bregðast við koma eftir atvikum daggæsluráðgjafar skóla og frístundasviðs og fagaðilar af leikskólaskrifstofu og lögfræðiþjónusta að því.

Rafræn eftirlitsskýrsla er fyllt út af eftirlitsaðila í eftirlitsheimsókn. Búið er að skrá inn í skýrsluna fyrir eftirlitsheimsóknina nafn/nöfn dagforeldra og barna sem viðkomandi dagforeldri hefur skráð hjá sér í vistun áður en eftirlitsheimsóknin fer fram. Í eftirlitsheimsókn kannar eftirlitsaðili hvort fjöldi barna og skráning þeirra sé rétt samkvæmt innsendum gögnum til skóla- og frístundasviðs frá viðkomandi dagforeldri. Í eftirlitsskýrslunni er einnig listi yfir öryggisatriði og aðbúnað vegna daggæslu barna í heimahúsum sem eftirlitsaðili fer yfir í eftirlitsheimsókninni.

### ***Viðbrögð vegna eftirlitsheimsókna:***

#### **a) Eftirlit án athugasemda**

Geri eftirlitsaðili engar athugasemdir við daggæslu á tilteknum vistunarstað er dagforeldri send skýrsla innan fimm virkra daga frá því að eftirlitið fór fram. Dagforeldri hefur fimm virka daga til að gera athugasemd við skýrsluna. Komi ekki fram athugasemdir telst skýrslan samþykkt af hálfu dagforeldris. Í langflestum óboðum eftirlitsheimsóknum árið 2025 var eftirlitið án athugasemda.

#### **b) Aðbúnaði barna ábótavant – leiðbeiningar og stuðningur**



**Reykjavík**



Séu gerðar minniháttar athugasemdir í eftirliti skv. 36 gr. reglugerðar nr. 907/2005 um daggæslu barna í heimahúsum sendir eftirlitsaðili dagforeldri skýrslu innan 3 virkra daga frá því að eftirlitið fór fram. Dagforeldri hefur að jafnaði fimm virkra daga til að gera athugasemdir við skýrsluna, annars telst hún samþykkt. Geri dagforeldri strax úrbætur sem eru fullnægjandi, telst málinu lokið. Bregðist dagforeldri ekki við, eða með ófullnægjandi hætti, upplýsir eftirlitsaðili fagaðila daggæslumála á leikskólaskrifstofu, um athugasemdir eftirlitsaðila með tölvupósti. Fagaðili daggæslumála á leikskólaskrifstofu og daggæsluráðgjafar fylgja athugasemdunum eftir með heimsókn til dagforeldra að jafnaði innan þriggja virkra daga eftir athugasemdir eftirlitsaðila. Í kjölfarið ber dagforeldri að gera viðeigandi úrbætur.

Athugasemdir undir þessum lið geta snúið að öryggisþáttum eins og sjúkrakassa, slökkvitæki eða reykskynjara, aðbúnaði barna sé á einhvern hátt ábótavant, eitthvað bendi til þess að ekki fari nægilega vel um barn eða að skilyrði til leyfisveitingar séu ekki lengur fyrir hendi.

Í 35 tilfellum á árinu 2025 voru gerðar athugasemdir um að aðbúnaði barna væri ábótavant. Í langflestum tilfellum brugðust dagforeldrar hratt við athugasemdum og úrbætur gerðar mjög fljótt eftir að eftirlitsheimsókn fór fram og í öllum tilfellum 2025 var málum lokað. Flestar athugasemdir eftirlitsaðila sneru að öryggishnappi dagforeldra, sem dagforeldri ber að hafa á sér á opnunartíma daggæslunnar og var því ábótavant í 14 tilfellum. Tíu athugasemdir sneru að því að yfirfara þyrfti slökkvitæki, sex athugasemdir voru gerðar vegna innihalds sjúkrakassa og fimm athugasemdir voru gerðar vegna reykskynjara.

#### **c) Barn telst í hættu statt – viðeigandi ráðstafanir**

Séu gerðar meiriháttar athugasemdir í eftirliti skv. 37 gr. reglugerðar nr. 907/2005 um daggæslu barna í heimahúsum gerir eftirlitsaðili fagaðila daggæslumála á leikskólaskrifstofu strax viðvart um athugasemdirnar.

Athugasemdir undir þessum lið geta snúið að því að aðbúnaði barna sé ábótavant, fjöldi barna sé umfram það sem leyfi kveður á um eða grunur sé um ofbeldi, vanrækslu eða skorti á umönnun eða öryggi barna í daggæslunni.

Gerðar voru tvær athugasemdir undir þessum lið og snéru þær að fjölda barna í vistun. Brugðist var hratt við athugasemdum eftirlitsaðila.

#### ***IV. Viðhorfskannanir***

##### ***Viðhorf foreldra til daggæslu:***

Niðurstöður viðhorfskönnunar liggja fyrir og verða kynntar á fundi leikskóla- og daggæslaráðs.



**Reykjavík**